

medicaminum quâ *componendi* quâ *præparandi* formulas dextrè & rationaliter instituere, quæ etiam brevitatis causâ festinanter silentio consecrata sunt, ex iisdem haud difficulter colligere possit, modò perpetim in memoriâ habeat, *non quodlibet, ex quolibet fieri; nec quodlibet pati à quolibet; neq. unumquodq. cuilibet, sed determinatum determinato, ac homogeneum homogeneo dextrè commisceri.* Cæterum quòd *Authoritatem Veterum* nec non *Recentiorum* quorundam, inprimis ubi ipsorum errores maximè conspicui fuère, non adeo sanctè ubiq; observârim, vitio mihi ne veritas *Amice Lector*, utpote quod usquequaque fieri non potuit, cum *Veritatem ipsam, Salutemq. Proximi Antecessorum nostrorum Authoritati*, vel *Modernorum non paucorum exigua fama*, quam ex conscribendis omnis generis *medicamentorum formulis ac compositionibus* sibi comparare voluère, longè anteferendam esse duxerim; quippe si illorum præscriptionibus ac traditis, sæpenumero *Rationi & Experientia* apertè reluctantibus, diutiùs firmiterq; insistere-mus, ac cum iisdem delirare pergeremus, demum & nos *Medicina hosti* deberemus ludibrium & *Posteris nostris* nosmetipsos risui exponeremus. Proinde me nil quicquam in posterum tangent vel angent acerba & ignominiosa cavillatorum quorundam dicta vel scripta: Etenim quisquis exactè & intimiùs omnia pensiculaverit, non poterit aliter, quin Veritati adstipuletur, mihiq; qui in omnibus illam ducem sequor, vel invitus suum det calculum. Sigillatim autem me non movebunt cavillationes indignantium nonnullorum Medicorum & Pharmacopœorum, qui grande nefas esse putant, à conceptis semel erroribus vel latum unguem recedere, vel meliora sequi; quibus tamen imperitiam suam palàm faciunt potius, quàm ut famæ meæ vim tantillam inferant, quorum injurias & nefandos insultus ipsâ *Veritate propugnatrice* propulsabo nullo dextram subeunte bacillo. Interea de bonis omnibus, cum *Doctissimis & Experientissimis Medicis*, tum *sedulis & peritis Pharmacopœis* amplam hanc spem concipio, quod *Veritatem* avida suscepturi sint, qui & certò sibi persuadeant, me nil nisi vera propriisque meis manibus tentata & experta huic operi inseruisse. Hisce *Lector Amice* vale, & quem ardens amor *Veri Proximiq. Salus*, quam undiq; pro lege habui, sedulum expressère laborem, ambabus, quod dicitur, ulnis amplectere, & conatus meos honestè interpretare. Hoc si Te facturum sensero, immortalitatem mihi partam dicam, *Tibiq. Tuisq.* commodis, dum spiritus hos reget artus, totum me devovebo. Dabam Viennæ, Anno M DC LII. Ipsis Maji Calendis.